

შეხვედრა ინდოელ ფეხბურთელებთან  
“დინამო” (თბილისი) – “ისტ-ბენგალ კლუბი” (კალკუტა)

ინდოელ და თბილისელ ფეხბურთელთა შეხვედრისადმი ინტერესი მეტად დიდი იყო. თბილისის “დინამოს” სტადიონი გუშინ ვერ იტევდა მაყურებლებს. ინდოელმა ფეხბურთელებმა დიდ წარმატებას მიაღწიეს ახლახან დამთავრებულ ახალგაზრდობისა და სტუდენტთა IV ფესტივალზე. მათ დაამარცხეს ლიბანის (6:0) და ავსტრიის (2:0) გუნდები და მეოთხე საპატიო ადგილზე გამოვიდნენ. 21 აგვისტოს კალკუტის “ისტ-ბენგალ კლუბი” მოსკოვში ეთამაშა სსრ კავშირის თასის მფლობელს “ტორპედოს” და შეხვედრა ფრედ – (3:3) დაამთავრა.

სრული 17 საათი და 30 წუთია. ფეხბურთის მარშის ჰანგებზე მოედანზე მხარდამხარ გამოდიან სტუმრები და მასპინძლები – ინდოელი და ქართველი ფეხბურთელები. ისინი ერთ მწკრივად ეწყობიან მოედნის ცენტრში.

კალკუტელებს მისასალმებელი სიტყვით მიმართა საქართველოს სსრ ჯანმრთელობის დაცვის მინისტრის მოადგილემ ანხ. ბ. კვინიხიძემ. გულთბილი საპასუხო სიტყვა წარმოსთქვა ინდოელ სპორტსმენთა დელეგაციის ხელმძღვანელმა ტიოტიმ ჩანდრა გუხამ.

დინამოელებმა ცოცხალი ყვავილების თაიგულები და სამახსოვრო ვიმპელები მიართვეს სტუმრებს.

საკავშირო კატეგორიის მსაჯმა ნ. ჩხატარაშვილმა მისცა თამაშის დაწყების ნიშანი. “დინამოს” ცენტრალურმა თავდამსხმელმა კალოევმა ბურთი თამაშში შეიყვანა.

ორიოდე წუთის განმავლობაში მსაჯს ორჯერ მოუხდა თამაშის განახლება მოედნის ცენტრიდან. ჯერ ანთაძე შეიჭრა მოწინააღმდეგის მცველთა განლაგებაში და ძლიერად დაარტყა კარში, “ისტ-ბენგალ კლუბის” მეკარემ გატაკმა ოდნავ დააგვიანა და მარცხენა ძელს მოხვედრილი ბურთი ბადეში გაეხვია. წუთის შემდეგ კ. გაგნიძე სწრაფად გაიჭრა მარჯვენა ფრთაზე და მის პარალელურად მიმყოლ კალოევს მიაწოდა. დარტყმა. გატაკმა კვლავ დააგვიანა და ანგარიში 2:0 გახდა.

თამაში დასაწყისში თითქმის მთლიანად კალკუტელთა ნახევარზე მიმდინარეობდა. სტუმართა მცველები ვერ იჭერდნენ დინამოელთა თავდამსხმელებს, აძლევდნენ მათ ბურთის მიღების საშუალებას და მერე ცდილობდნენ მის წართმევას, ეს კი მათთვის ძნელი შესასრულებელი აღმოჩნდა. დინამოელები თამაშობდნენ მოედნის მთელ სიგანეზე, მოწინააღმდეგეს მცველები ერთმანეთს დიდი მანძილით ჰყავდათ დაცილებული და თავისუფლად გადიოდნენ მათ შორის. სტუმრების მცველები დორაილინგამი, კუმარი, შოამი და სხვანი ერთხანს ახერხებდნენ კარის უვნებელყოფას, მაგრამ მე-8 წუთზე მახარაძემ მიიღო ღოღობერიძის გადაცემა, კარგა ხანს ატარა ბურთი და მერე შორი მანძილიდან ძლიერად დაარტყა კარში. გატაკმა მესამე ბურთი გამოიტანა ბადიდან.

ინდოელებმა რამდენიმე ხნით თამაში მოპირდაპირე ნახევარზე გადმოიტანეს, მათი თავდამსხმელები, რომლებიც ფეხშიშველა, სპეციალური სახვევებით თამაშობდნენ, მოკლე, ხშირი და სწრაფი გადაცემებით საკმაო მანძილს გადიოდნენ მოედანზე. მარლანია პირველად თამაშში მხოლოდ მე-12 წუთზე ჩაება.

ღოღობერიძემ ჩვეული ოსტატობით ჩამოხსნა მაღალი ბურთი და შეუფერხებლად მიუახლოვდა მოწინააღმდეგის კარს. ძლიერად დარტყმული ბურთი ძელმა “მოიგერია”, მაგრამ კოტრიკაძე სწრაფად გაჩნდა ადგილზე და ანგარიში 4-მდე გაიზარდა.

შემდგომში სტუმრები შესამჩნევად გამოცოცხლდნენ. რამდენიმე სახიფათო გარღვევას ახორციელებენ გარემარბები ვენკატეში და ფაკრი, ბევრს და დაუღალავად მუშაობენ შუამარბები აპარაო და კანი, ბურთის ტარების კარგი ტექნიკა გამოამჟღავნა ცენტრალურმა თავდამსხმელმა ტანგრატმა.

21-ე წუთზე დინამოელმა თავდამსხმელებმა მრავალსვლიანი კომბინაცია გაითამაშეს, რომელიც კალოევმა მეხუთე გოლით დააგვირგვინა. მალე წარმატებას მიაღწიეს სტუმრებმაც. ტანგრატმა მიიღო ფაკრის გადაცემა და ზედ პირით ხაზიდან, აკრობატულ ნახტომში, თავის თავს ზემოდან ფრიად “ეგზოტიკური” ბურთი გაიტანა. 1:5. მაყურებლები მქუხარე ტაშით შეეგებნენ ინდოელთა წარმატებას. თბილისელებს კიდევ ჰქონდათ ბურთის გატანის შესაძლებლობა, მაგრამ ღოღობერიძე, მახარაძე და ჭკუასელი ისე მიდიოდნენ ბურთით კარის ხაზამდე, რომ დარტყმა ავიწყდებოდათ.

მეორე ტაიმი დაიწყო იმით, რომ მარღანიას ზედიზედ სამჯერ მოუხდა ბურთების აღება. დინამოელებმა საგრძნობლად მოუკლეს თამაშის ტემპს და ინიციატივაც სტუმრებს ჩააბარეს. ტანგრატი, კანი და აპარაო კარგა ხანს თავისუფლად გადიოდნენ მოწინააღმდეგის მცველთა შორის. მაგრამ “ისტ-ბენგალ კლუბის” მოთამაშეები მალე დაიღალნენ და მოედანს კვლავ თბილისელები დაეპატრონენ. თამაშმა ისევ ინდოელთა კართან გადაინაცვლა. ერთ-ერთ შეტევისას კალოევი მოფიქრებულად გავიდა კოტრიკაძის მოწოდებულ ბურთზე და თავით გაიტანა იგი. 6:1.

თბილისელებმა შეცვალეს რამდენიმე მოთამაშე, მოედანზე გამოვიდნენ კიტია, გოგლიძე და ვარდიმიადი. ცვლილება მოხდა ინდოელთა შორისაც.

35-ე წუთზე მახარაძემ ბურთიანად მიაღწია პირით ხაზს და მოულოდნელად მიაწოდა ვარდიმიადის – 7:1. ორი წუთის შემდეგ სადემონსტრაციო ფარებზე 8:1 ეწერა. ეს კალოევმა გამოიყენა კოტრიკაძის გადაცემა.

გონგის შემდეგ კალკუტის გუნდმა ერთხელ კიდევ დაიწყო ცენტრიდან. ბოლო, მე-9 ბურთი გაგნიძემ გაიტანა.

მატჩი, რომელიც უაღრესად მეგობრულ, გულთბილ ვითარებაში ჩატარდა, დამთავრდა თბილისის “დინამოს” გამარჯვებით, ანგარიშით 9:1.

ბ. ქორქია.

23 აგვისტო, 1953 წ.